


Сөз зергері – Сейіт Кенжеахметұлы

Торғай топырағынан түлеп ұшып, барша қазаққа пайдалы іс атқарған азаматтарымыздың бірі де бірегейі – Сейіт Кенжеахметұлы екені даусыз. Қазақтың тілі мен салт – дәстүрін дамытып, дәріптеуге өлшеусіз үлес қосқан ағамыздың өмір жолы кейінгі ұрпаққа өнеге.

Сейіт Кенжеахметұлы саналы ғұмырын қазақ халқының игілігіне арнаған тұлға. Әдебиет әлеміне алғаш рет жарқ етіп сатиралық өлеңдер мен мысалдар жазумен шықты. Астарлы ой арқылы қоғамды тәрбиелеуді мақсат тұтқан әзіл – сықақ қойылымдары сол кездегі еліміздегі ең танымал «Тамаша» театры арқылы 30 жыл бойы көрерменнің көзайымына айналды. Қазір де қаламгердің туындылары түрлі өнер ұжымдары арқылы әзіл сүйер ағайынға насихатталып келеді.

Сейіт ағамыз сатирадан бөлек, салт – дәстүрімізді жаңғырту жолындағы еңбектерімен де елдің ықыласына бөленді. «Жеті қазына» атты 4 кітаптан тұратын ұлт мәдениетіне арнаған ғылыми еңбегі жарық көріп, «Қазақ халқының салт-дәстүрлері», «Қазақтың дархан дастарханы» атты көлемді энциклопедиялық дүниелері қазақ, орыс, ағылшын, қытай, түрік, азірбайжан, т.б. тілдерде басылып шықты. «Қазақ халқының тұрмысы мен мәдениеті» деп ата-



латын этнографиялық танымдық еңбегі 2006, 2007 жылдары Мәскеуде өткен әлемдік кітап баспаларының көрмесінде 2 рет үшінші дәрежелі диплом мен бағалы сыйлыққа ие болғанын да мақтанышпен айта аламыз.

Жерлесіміздің аудармашылық таланты бір төбе. Сейіт КЕНЖЕАХМЕТОВ аударған С.Олейник, С.Михалков, Ә.Несин, И.Крылов, т.б. ақын-жазушылардың шығармалары қазір де әдебиет сүйер қауымның игілігіне жарап тұр. Онымен қоса қазақтың мысал аңгімелері мен өлеңдерін құрастырып жарыққа шығарды.

Ол кісі шығармашылықтан бөлек қарым – қабілетін түрлі қызметтерде жүріп те қоғам пайдасына жарата білді. Кәсіби журналшы ретінде еңбек жолын аудандық «Жаңа өмір» газетінің бөлім меңгерушілігінен бастап, он жылдан аса Қостанай, Торғай облыстық газеттерінде әдеби қызметкер, бөлім меңгерушісі, жауапты хатшы болды. Қазақстан Жазушылар одағының Торғай

облысындағы кеңесшісі, Торғай облыстық «Қазақ тілі» қоғамының төрағасы, Ы.Алтынсарин атындағы Арқалық педагогика институтында доцент, кафедра меңгерушісі, қазақ әдебиеті тарихынан дәріс оқушы, Торғай облыстық «Қазақ тілі» қоғамының төрағасы, Л.Гумилев атындағы Еуразия ұлттық университеті жанындағы «Отырар кітапханасы» Ғылыми-зерттеу орталығында аға ғылыми қызметкер, жетекші ғылыми қызметкер, Ы.Алтынсарин атындағы Арқалық мемлекеттік педагогикалық институты ректорының кеңесшісі, институттың ғылыми-зерттеу орталығының аға ғылыми қызметкері міндетін де даңқты жерлесіміз абыроймен атқарған еді.

Талантты қаламгер осынша еңбегі үшін түрлі марапаттарды да иеленді. Ол кісі Қостанай облысы меценаттарының «Қазына» сыйлығының, «Ана тілі» газетінің «Ана тілінің саңлағы» құрметті атағының иегері, Торғай және Арқалық қалаларының «Құрметті азаматы», ҚР «Білім беру ісінің құрметті қызметкері», «Қаз ССР Халық ағарту ісінің үздік қызметкері», ҚР «Құрмет» грамотасымен марапатталған.

Осы жазылған мәліметтердің барлығы Арқалық өңірлік мемлекеттік мұрағатында сақталған. Ол кісі жайлы білгісі келетіндерге біз бұл ақпараттарды толыққанды ұсынуға әркез дайынбыз.

Эльмира ҚҰРЫМБАЕВА,
Арқалық өңірлік мемлекеттік архивінің жоғары сапатты архивісі.